

O mata no riyar

Ira ko tanestesay a kapah ci Kacaw, nano kaemangan ho cingra, pakatengil to to nikimadan ni akong ningra to pakayniay to no riyar a kimad. Sowel sa ci akong ningra “ I talolongay no riyar, ira ko makapahay a fafaxo, matiya o sata’angay a mata ano manengneng i lalinik no riyar, saka o mata no riyar ko sapangangan.” Palimo’ot sa ci akong ni Kacaw, “ Mafana’ minengneng ko mata no riyar to faloco’ no miso, ano ira ko salongoc no miso i, paini i tisowanan; nika ano ma’anof kiso i, mahinac kiso, kafana’ kiso Kacaw!” Maparo i faloco’ ni Kacaw kona palimo’otan ni akong, to romi’ami’ad mifoting caay pakinali patatodong sa, caay ka’anof ko faloco’ ningra.

Yo cecay romi’ad, talariyar micelem ci Kacaw, fahal sa makera nira i ngala’ no karakaran no raka ko malikatay a fafaxo. Nano paka’araw cingra to fafaxo i, onini ko safangcalay a fafaxo, tadamahemek cingra a panokay. Yo pakaa’araw ko finawlan no niyaro’ toni a fafaxo, matatootoor a milicay “ Samanen a miala, manga’ay mamafalic to malokakaenen iso?” Nanoya , tada cingangan to ci Kacaw. Palata’angen to no ’alomanay, matawal to nira ko palimo’otan no akong nira, oya ma’anofay a faloco’ nira tongatongal sato a molengaw. Misatapang to pararid micelem talalinik no riyar , ma’anof to

ko ’adihadihay ko pinaala to “fafaxo” saan, satikotiko sato miliyaw a miala.

Tongatongal sato ko ’anof no faloco’ ni Kacaw. Matama nira ko dihi no fafaxo, masapatek ka adihay no fafaxo itira, matiya to o fo’is no kakarayan. Maseka’ to ko fongoh ni Kacaw tona ka’ayaway a fafaxo, haemin han nira miparo i rakar ningra ko fafaxo. Nika ya mamacakat cingra talafafaed, kafahalan ira ko likid no riyar malikid ko wa’ay nira, kareteng koya fafaxo, caay kanga’ay nira a misolot . Safirofiroen nira ngalengalef sa maleneng, karateng ko rakar ni Kacaw, Maharateng to ningra, o ’anof no tireng ko saka wa’il i cingraan.

Awaen to pafaloco’an cingra, falahen to ningra ko rakar. Kinafalah sa midangoy, yo mamada’at to macakat to a mapawpaw a talahekal cingra . Wakang sa i tafotafokan, minengneng to kakarayan a misaharateng, awaay to ko ka’anofan i mata ningara, edeng to o kalimela to ’orip ato pingodo to Kawas. Nano itiya i, matatiko to ko faloco’ ni Kacaw,caaay to pakinali a micekiw. Talipa’elal to cingra to nika caayay ko nika paka’araw ko mata no fafaxo, o nano i kemod no faloco’ ningra ko sapilicay ningra to kangodoan ato kansiyaan no faloco’.

大海的眼睛

Kacaw 從小聽著爺爺的教誨長大，知道深海中的「大海的眼睛」會看透人心——知足者得饋贈，貪婪者必失。起初謹守分寸，與大海和諧共存，但當一顆月光螺為他換來名聲後，內心的貪婪開始發芽、迷失，他試圖帶走成千上萬的月光螺，沉重的慾望將他拖往淵。在生死的邊緣，他終於學會「鬆手」，才得以死裡逃生。真正的「大海的眼睛」並非實體的螺殼，是內心那雙懂得「知足」與「感恩」的眼睛。生命中最珍貴的財富，來自那份不被慾望束縛的單純。